

La imigrazion percepide. Il câs di studi dal Comun di Puçui

MARIANNA STELLA*

Ristret. Chest studi al esplore la percezion dai residents dal comun furlan di Puçui tai confronts dal fenomen imigratori dai forescj. Pe sô realizazion e je stade condusude une indagjin demoscopiche formulade traviers di un cuestionari di sessante domandis dividudis in trê sezions tematichis; il cuestionari al è stât inviât par pueste a un campion de popolazion sielzût in modalitât random e stimât al dîs par cent dai residents, mantignint inalterade cheste cuote par ognidune des frazions dal teritori comunâl. Lis rispuestis al cuestionari autosoministrât a son stadis analizadis traviers dal software di statistiche “Statistical Package for Social Science”.

I risultâts ripuartâts in chest articul a rapresentin une part de totalitât des rispuestis che, tai câs di interès, a son stadis incrosadis fra di lôr di mût di furnî une imagjin complete ancje tal detai par chel che al rivuarde la percezion di chest fenomen. In chest studi al ven a flôr un interès pes cuistions relativis al procès de imigrazion che, in gjenerâl, si dimostre plui sostignût pai rispuindints des fassis di etât plui zovinis e pai contescj gjeografics plui dongje, e par cuintri mancûl significatîf pes fassis di etât plui anzianis e pai contescj spaziâi plui lontans. Sedi ae solidarietât che al bon acet e ven ricognossude une impuartance significative, cuntune propension pe solidarietât; tes rispuestis si cjate ad ogni mût une variazion par chel che al rivuarde la preference dai destinataris dai doi sintiments, dulà che la solidarietât e ven indreçade a “cualsisei”, e invezit l’acet si lu rivolç soredu a lis personis plui dongje dal contest di vite di cui che al rispuint.

In chest lavôr si à ponude atenzion ancje ae analisi des carateristicis dai imigrâts dal forest, relativementri al paîs di divignince dal imigrât, ae sô religion, titul di studi e motîf di rivade; cheste ultime e je considerade la variabile che e ven plui tignude in considerazion dal autocton. Dal studi al ven fûr che il paîs di divignince dal forest, ancje se nol è considerât une variabile influente par determinâ l’acet di une persone straniere, al ven ad ogni mût tignût in considerazion. In cont di chest, lis rispuestis a mostrin che la preference acordade a provignincis tant che Europe Ocidentâl e Nord Americhe si compagne cuntune plui alte tindince a refudâ cui che al rive di un paîs arap; l’ordin des preferencis pes areis

* Dipartimento di Scienzi Umanis, Università dal Friûl, Udin, Italie.
E-mail: marianna.stella@uniud.it

geografichis al ven mantignût par dutis lis diviersis categoriis di relazion sociâl proponudis te indagjin. In chest studi, se e risulte une preference pes realtâts plui dongje di chês dal autocton, e emerç in ogni câs une sô sostanziâl viertidure aes componentis forestis, che lu puartin a jentrâ in contat cui imigrâts cence però pierdi il control de sô realtât e dal so spazi di vite.

Peraulis clâf. Percezion, fenomen imigratori, autoctons, comun di Puçui, indagjin demoscopiche, cuestionari autosoministrât, acet, integrazion.

1. I studis de percezion de imigrazion, dal globâl al locâl. Lis imigrazions a son simpri plui ogjet di atenzion de bande dai diviers atôrs sociâi, tant che lis istituzions e lis organizacions che si ocupin de tutele des personis imigradis e des lôr diviersis necessitâts e problematichis, i setôrs governatîfs a varis nivei e areis di competence deputâts al control, ae regolamentazion e al coordinament dai ingrès, i ambits academics che traviers lis diviersis disciplinis a studiin i flus imigratoris e lis lôr ricjadudis, i setôrs divulgatîfs che a trasmetin al public i inzornaments su lis cuescions relativis ae imigrazion foreste, e infin lis personis che a vivin sul teritori indulà che cheste imigrazion si manifeste, diventant cussì osservadôrs privilegjâts dal inseriment e de integrazion dai gnûfs rivâts.

Tal studi des imigrazions la analisi de percezion e je une componente impuartante, stant che e permet di discuvierzi e scrutinâ la cognossince e il judizi de int in cont di chest fenomen e dai aspjets corelâts che lu caraterizin o che di lui a son determinâts – come par esempi lis modalitâts di convivençe interetniche, la presince o mancjance di dialic interetnic o la tindince ae cooperazion – e di butâ lis fondis di eventuâi mioraments.

La impuartance di cognossi la percezion de popolazion locâl e je confermade de presince e dal finanziament di studis su la imigrazion condusûts sedi a nivel intercontinentâl che a nivel plui locâl. Tal prin câs interessant e di spessôr a son lis indagjins realizadis dal German Marshall Fund in paralêl tai Stâts Unîts de Americhe e in Europe par confrontâ i dâts relatîfs ae opinion publice in materie di imigrazion di une bande e di chê altre dal Atlantic e tra i singui stâts interessâts de indagjin; il raport finâl di chescj sondaç di opinion al rapresente cussì un strument significatîf in materie di studi globâl de percezion de imigrazion (The German Marshall Fund of The United States 2008, 2009, 2010, 2011). Dongje di chest termometri autorevul dai sintiments de opinion publi-

che europeane e americane rispjet ae cuestion transatlantiche de imigrazion, a son ancje recentis e interessantis indagjins su la percezion de imigrazion davueltis a nivel nazionâl de bande di paîs europeans di lungje tradizion imigratorie come par esempi il Ream Unît (Ford 2012), la Gjermanie (Diehl e Steinmann 2012) e la France (Di Giusto e Jolly 2008). Te stesse maniere ancje fûr dai confins dal vecjo continent, e in particolâr tai paîs anglofons extraeuropeans caraterizâts di livei significatîfs di imigrazion dal forest come Australie, Canada e Stâts Unîts de Americhe, il sondaç di opinion in materie di imigrazion al è un strument une vore doprât (Espenshade e Calhoun 1993, Binder, Polinard e Wrinkle 1997, Haubert e Fussel 2006, Simon e Sikich 2007, Wilkes, Guppy e Farris 2008, Nanos 2010, Bloemraad 2012, Gallup 2012, Polling Report 2012, Vision Critical 2012). Lis indagjins, in plui di slargjâsi a nivel nazionâl, a puedin cjapâ in considerazion une aree gjeografiche specifiche. Tai Stâts Unîts de Americhe, par esempi, une vore di ricercjîs su la opinion publiche in cont di cheste tematiche si è concentrate tes areis cun altis percentuâls di ricezion di imigrâts, come par esempi la Californie meridionâl, il Texas e, in cressint, ancje la part plui a sud-est dai Stâts Unîts (Timberlake e Williams, in publicazion); naturalmentri cheste tematiche e ven studiade ancje in stâts e regions cun minôr incidence di imigrâts (Hethling e Greenberg 2011). La percezion tai confronts de imigrazion e je ricercjade, duncje, a varis nivei gjeografics, dal plui al mancul ampli, e cun preference par chei caraterizâts di presincis relevantis di forescj dal pont di viste cuantitatîf o de specificitât etniche. I monitoraç inzornâts e lis lôr comparazions cronologjichis e spaziâls a dimostrin partant un interès par cheste aree di ricercje che al tint a jessi prolungjât tal timp e universalmentri condividût.

I studis che a analizin lis impressions e i compuartaments de int tai confronts dal fenomen imigratori in gjenerâl, e tai confronts dai imigrâts e des politicis migratoriis in particolâr, no apartegnin ad ogni mût dome a chest periodi storic. Pal contest american, par esempi, Timberlake e Williams (in publicazion) a ricuardin che relazions storichis cirche ategjaments anti-imigratoris si cjatin za tal Votcent e te prime part dal Nûfcent, ancje se al è dome tai ultins vincjecinc agns che e je nassude une sostanzial leterature sientifiche in cjamp sociâl che e esamine i ategjaments publics tai confronts des politicis migratoriis sedi tai Stâts Unîts

sedi ta chês altris nazions ospitis. In Italie l'interès par chest argoment si è dismot viers i agns Otante dal Nûfcent, cuant che si à scuiert che il Paîs al jere diventât ancje di imigrazion (Bonifazi 2006, Pugliese 2006); la pratiche de indagjin de percezion dal fenomen imigratori te Penisule e je duncje une vore resinte.

La atenzion pandude a nivel internazionâl pai studis su la percezion dal fenomen imigratori e mostre come che chescj, in plui che jessi indicadôrs essenziâi par lei in maniere ogjetive une cierte realtât contingente o i siei singui aspjets, come par esempi il grât di acet des personis forestis, a puedin rapresentâ un strument fundamentâl ancje pe metode in vore di azions publichis a favôr di dute la comunitât, come che e pues jessi la corezion di politicis che no sigurin une reâl convivençe armoniche tra lis sôs componentis.

L'interès a studiâ lis impressions e la cognossince dal fenomen imigratori de bande de popolazion autoctone e à puartât te primevere dal 2009 a realizâ tal teritori dal comun di Puçui, te provincie di Udin, une indagjin demoscopiche su la percezion dai residents di chest contest teritoriâl relativementri ae imigrazion di personis forestis. Cheste realtât locâl, pe presince tal so teritori di un centri di ospitalitât par personis forestis in stât di dibisugne, atîf zaromai di vincj agns, e rapresente un câs emblematic di condivizion dal spazi di vite tra locâi e imigrâts dal forest; la siele di cheste aree comunâl in particolâr pal studi demoscopic e je derivade de cognossince pregresse dal contest ancje sot dal aspjet de ativitât di bon acet davuelte dal centri, che di bande sô al è stât ogjet di studi (Stella 2011).

L'obietîf de ricercje al è stât chel di discuvierzi e meti adun la percezion dai residents dal comun di Puçui relativementri al fenomen imigratori di personis forestis, ufrint tal stes timp un dât concret par une eventuâl comparazion diacroniche su cheste tematiche di simpri plui grant interès sociâl. Il strument doprât par cheste finalitât al è stât un cuestionari autosoministrât che al è stât inviât par pueste a 250 residents dal comun (il dîs par cent des personis registradis in anagrafe), sedi talianis che forestis, che a son stadis individuadis traviers estrazion casuâl. Il formulari al è stât inviât cu la stesse percentuâl dal 10% de popolazion a dutis lis frazions dal teritori comunâl; dopo jessi stât compilât dai destinatari al è stât spedît indaûr al mitent (il comun di Puçui) simpri par pue-

ste dentri cuindis zornadis de ricezion. Il cuestionari al cjavave dentri sessante domandis a rispueste multiple dividudis in trê sezions: une prime relative al profil dai rispundints, une seconde su la percezion dal fenomen imigratori e une tierce che e cjale il centri di acet e promoziun culturâl “Ernesto Balducci”.

A àn cjavât part ae ricercje plui di un cuart dai destinatariis, o sei il 26,8 par cent; la percentuâl in difiet e rapresente i cuestionariis no tornâts indaûr dentri de date indicade, o mai restituîts. Lis rispuestis a son stadis analizadis travers dal software di statistiche pes sciencis sociâls “Statistical Package for Social Science”; in considerazion dal grant numar di dâts tirâts dongje te indagjin, in chest contest si propon une lôr selezion.

2. La percezion dal fenomen imigratori de bande dai residents dal Comun di Puçui. Risultâts e discussion. De prime sezion dal cuestionari dedicade al profil dai rispundints al risulde che chei che a àn partecipât al studi demoscopic a son ducj citadins talians di origjin taliane, soredut oms (66%), cuntune etât comprendude principalmèntri tra i 41 e i 65 agns (44%); a seguissin lis personis di plui di 65 agns di etât (34%) e chei tra i 26 e i 40 agns (22%); no si regjistrin personis cuntune etât tra i 18 e i 25 agns. Par chel che al rivuarde la ocupazion, la maiorance des personis e à un lavôr (49%) o e je pensionade (48%); chei cence ocupazion fûr dai mûrs di cjase a rapresentin la minorance (3%) e no si rileve nissun student tra i partecipants ae indagjin. Relativementri ai dâts su la istruzion, la maiorance di cui che al rispuint al declare di vê un titul di studi di scuele medie inferiôr (32%); a seguissin licence elementâr (29%), titul di scuele medie superiôr (27%) e lauree (13%). La maiorance des personis e declare di jessi gjenitôr (75%), chei cence fîs a rapresentin invezit il 25%. Su la residence, i partecipants al scandai a afermin di risiedi in Italie e in comun di Puçui di tant timp, vâl a dî di quant che a son nassûts (rispetivementri pal 98% e 33%) o di plui di 25 agns (rispetivementri 2% e 28%); pal comun di Puçui la percentuâl di deficit e je rapresentade di chei che a son residents di mancûl di 25 agns.

Sul cont des esperiencis emigratoriis e dal desideri di emigrazion dai residents dal comun, si scuvièrç che il 16% di chei che a rispundin al è emigrât intun Paîs oltran tal cors de sô vite, là che invezit l’84% nol à vût nissune esperiencie di emigrazion tal forest (Figure 1).




Figure 1. Fonts: Indagjin demoscopiche 2009.

Aprofondint la valutazion di come che e je stade la esperience di emigrât par cui che le vedi vivude, lis rispuestis positivis a prevalin su chês negativis. Cun di fat, plui dal 46% al judiche la esperience “normâl” conferintji duncje une acezion neutre, il 45% le considere “biele” o “une vore bieles” privilegjant a ogni mût la prime tra chestis dôs opinions; un restant 9% nol savarès valutâ la esperience vivude (Figure 2).

Al à someât interessant podê capî, cun di plui, se cualchidun al sintîs il desideri di emigrâ intun paîs forest; dal risultât si rigjave che la maiorange dai partecipants ae indagjin no à voie di emigrâ tal forest (76%) cuant che invezit un 18% al rispuint in maniere afermative a cheste domande; il restant 6% al rapresente i incierts che a optin pe rispueste “no sai” (Figure 3). Ancje se la maiorange di cui che al rispuint nol à intenzion di trasferisi fûr dai confins talians, la percentuâl des personis che invezit a varessin gust di espatriâ e reste alte: cuasi une persone su cinc e desiderarès emigrâ intun altri Paîs.

La maiorange des personis che a varessin voie di trasferîsi a declarin che daûr di cheste siele a son soredut motîfs “diviers” di chei economics e di lavôr o di chei afetîfs e familiârs (50%); a seguissin i motîfs economics e di lavôr (42%) e i motîfs afetîfs e familiârs (8%); nissun tra chei che a rispuintin al emigrarès tal forest par motîfs di studi, coerentementri ae manciance de fasse di etât e de categorie ocupazionâl plui interessadis a cheste motivazion, vâl a i zovins di 18-25 agns e i students (Figure 4).

Incosant il parê dai rispundints cu lis lôr etâts si viôt che par ogni fas-




Figure 2. Fonts: Indagjin demoscopiche 2009.




Figure 3. Fonts: Indagjin demoscopiche 2009.




Figure 4. Fonts: Indagjin demoscopiche 2009.

se di età al prevâl il desideri di restâ tal Paîs di divignince rispjet ae ipotesî di trasferîsi tal forest; cheste percentuâl e je resonevolmentri plui alte te fasce di età plui avanzade, o sei lis personis cun plui di 65 agns (il 91% di lôr nol varès voie di emigrâ intun altri Paîs), e si sbasse di plui di vincj ponts percentuâl te fasce di età dai 41-65 agns e ta chê dai zovins adults (26-40 agns), che a rispundin di no volê emigrâ intun altri paîs te misure, tal ordin, dal 68% e dal 69% (Figure 5). Si podarès dedusi che, in gjenerâl, la fasce di età plui avanzade e sedi chê mancul intenzionade in assolût a emigrâ, e che invezit lis fassis plui zovinis a sedin chês plui propensis a un trasferiment eventuâl tal forest. Aprofondint la analisi de relazion tra età e desideri di emigrazion cheste tesi e ven però parzialmentri confutate: al risulte particolarmentri interessant il fat che tra chei che a rispundin di desiderâ di trasferîsi tal forest la maiorance e vedi une età comprendude tra i 41 e i 65 agns (29%) e che lis personis tra i 26 e i 40 agns di età a dimostrin par cuintri un desideri di emigrazion mancul fuart rispjet a dutis lis categoriis (8%), lant cussì a metisi di flanc ae fasce di età di chei cun plui di 65 agns che a emigraressin pal 9% (Figure 5).

Stant che lis personis tra i 41 e i 65 agns di età a varessin di vê une stabilitât familiâr e ocupazionâl tâl di rindi un trasferiment plui dificil e in ogni câs presumibilmentri mancul necessari rispjet a altris fassis di età, il dât relatîf a cheste categorie, dulà che plui di une persone su cuatri e pant un desideri di emigrazion, al è un risultât pluitost inspietât. Il fat che fin une persone su dîs cun età superiôr ai 65 agns e declaredi di vê voie di emigrâ tal forest al podarès derivâ dal desideri di trasferîsi tal forest par motîfs di ricrei, magari limitât dome a cierts tîmps dal an, e in chest câs si tratarès di migrazions stagjonâls par motîfs turistics; cheste ipotesî e sarès sopuartade di esemplis concrets di personis in età di cuiessence che a gjoldin di disponibilitât economiche e di tîmp, e che a decidin di passâ i agns de pension in lûcs esotics: in chest câs un riferiment al è rapresentât de mobilitât di americans viers de Floride e di todescs viers de Spagne meridionâl.

Di chest incrosament al ven fûr, par prionte, che la fasce di età cun plui inciertece rispjet al desideri di emigrâ intun paîs forest e je chê dai zovins adults. In fat, il 23% nol sa se al varès voie di trasferîsi intun altri paîs, a pet dal 4% dai insigûrs tra i 41 e i 65 agns e di nissun dai rispun-




Figure 5. Fonts: Indagjin demoscopiche 2009.

dints cun plui di 65 agns (Figure 5). Il dubi principâl de fasce di età plui zovine tai confronts di une pussibile emigrazion tal forest al podarès jessi interpretât ancje come une perplessità gjenerazionâl di fonde rispjet ae lôr programazion dal futûr. Chest dât al puarte inevitabilmentri ancje a un confront cu la tipologjie di emigrants furlans che a vevin lassât la lôr tiere tra la fin dal Votcent e la metât dal Nûfcent; cundut che il contest socioeconomic e lis prospetivis di vite a son cumò une vore diviersis rispjet a chê fase storiche, i migrants di in chê volte e chei potenziâi di vuê a apartignaressin a une fasce anagrafiche dal dut diferente, sì che in di di vuê lis personis a son plui orientadis ae partence intune fase di vite plui madure (Caporiacco 1983, Pagani 1968).

Une volte stabilît il profil dai participants al scandai, si à volût aprofondî il lôr sentiment in riferiment al fenomen imigratori. Di un prin cuesît che al puartave a valutâ l'interès de popolazion pes cuistions relativis ae imigrazion, lis rispuestis a àn evidenziât une fuarte atenzion in ducj i ambits teritoriâi proponûts (Europe, Italie, Friûl Vignesie Julie, provincie di Udin e comun di Puçui): par ogni contest gjeografic la sume des rispuestis “une vore” e “avonde” interessât e je in fat di tant superiôr al totâl des rispuestis “pôc” e “par nuie” interessât. Par dutis lis areis teritoriâls il coinvolziment al è calculât ator dal 80%, cu la ecezion di chê europeane dulà che invezit si ferme al 69%; fasint riferiment dome ae rispueste “une vore” interessât si note che il coinvolziment al au-

mente a man a man che si passe di un contest distant a un plui dongje: duncje se pal contest european l'interès di cui che al rispuint al è dal 17%, par chel nazionâl al aumete al 33%, par chel regionâl al va sù al 39%, par chel provinciâl al 40% e par chel comunâl al 41% (Figuris 6-10).

Incosant la domande a pene analizade cu lis fassis di etât, si scuvierç che dutis lis fassis a son interessadis (“une vore” e “avonde”) ai problemis relatîfs ae imigrazion par ogni contest teritoriâl. Si cjate, cun di plui, che l'interès al è proporzionâl in maniere invierse ae etât: tant plui basse e je la fasse di etât, tant plui alt al è l'interès, là che invezit a une fasse di etât superiôr al corispuint un grât di coinvoleziment plui bas. In particolâr si pues notâ che lis personis di 26-40 agns di etât, vâl a dí chês che a ven vin esprimût un desideri minôr di emigrâ tal forest, a son ancje plui partecipis aes cuistions relativis ae imigrazion (Figuris 11-15).

In chest contest, dal fenomen imigrazion a dipendin i concets di solidarietât e acet; l'ingrès di une persone intun Paîs diviers di chel di divignince al compuarte par fuarce, almancul fin che no si rive a realizâ e mantignî un inseriment zovevul de persone tal contest sociâl, un jutori de bande dai diviers atôrs sociâi locâi, e chest al determine un vantaç par dutis dôs lis parts: autoctone e alogjene. L'autocton tant che persone single al è clamât, ancje se no cun obligatorietât, a rispuinti tai confronts dai forescj in tiermins di solidarietât e di acet; traviers di un cuesît relatîf a ognidun di chescj doi concets si à volût capî la impuartance che ur ven tribuide dai participants al scandai e la lôr predisposizion tal concediju e tal orientâju viers diviersis categoriis di personis. Al è stât domandât, partant, se la solidarietât e l'acet a son impuartants par cui che al rispuint; in ducj i doi i câs i ategjaments di aiût a son considerâts impuartants, in fat, la sume di “une vore” e “avonde” impuartant al è par ognidun dai doi cuesîts une vore superiôr rispjet al totâl des rispuestis “pôc” e “par nuie” (Figuris 16-17). Par chel che al rivuarde la solidarietât, dentri dal mont contemporani, segnât di procès di modificazion de composizion culturâl, di individualizazion e di globalizazion che a gjenerin inciertecis e sens di isolament, si riscontre une necessitât simpri plui grande di chest sintiment, duncje ancje di viertidure, jutori e supuart (Amaturo 2004, Cattarinussi 2006). In tiermins di percentuâl, si cjate che la solidarietât e ven considerade di cui che al rispuint plui impuartante dal acet (91% e 84% tal ordin); si pues ipotizâ che chest al sucedi parcè che




Figure 6. Fonts: Indagjin demoscopiche 2009.




Figure 7. Fonts: Indagjin demoscopiche 2009.




Figure 8. Fonts: Indagjin demoscopiche 2009.




Figure 9. Fonts: Indagjin demoscopiche 2009.




Figure 10. Fonts: Indagjin demoscopiche 2009.




Figure 11. Fonts: Indagjin demoscopiche 2009.




Figure 12. Fonts: Indagjin demoscopiche 2009.




Figure 13. Fonts: Indagjin demoscopiche 2009.




Figure 14. Fonts: Indagjin demoscopiche 2009.




Figure 15. Fonts: Indagjin demoscopiche 2009.




Figure 16. Fonts: Indagjin demoscopiche 2009.




Figure 17. Fonts: Indagjin demoscopiche 2009.

l'acet al pues jessi intindût tant che sostegn che al compuarte sei il contat diret cun cui che lu ricêf che la condivision di un spazi comun, là che invezit la solidarietât no ju proviôt par fuarce, stant che e podarès jessi semplicementri intindude come sostegn a distance. Dai cuesîts sucessîfs al ven fûr che la solidarietât e ven concedude principalmmenti a “cualsisei” (43%), par cuintri l'acet si lu ufrirès principalmmenti al grup dai “parincj, amîs, cognossints” (46%) e dome dopo a “cualsisei” (26%); par cui che al rispuint l'acet, rispjet ae solidarietât, al presupon duncje une selezion plui grande (Figuris 18-19). Chest concet centrâl di “selezion” al è contignût te formule de “Core Solidarity”, une tipologjie di solidarietât che i components di une societât a concedin dome a chei che a vedin carateristichis che si puedin ricondusi aes lôr, come par esempi la apartignince familiâr o etniche comune (Zamperini 2004). Par cuintri la solidarietât che cui che al rispuint al scandai al concêt in mût indipendent des carateristichis de persone destinatarie e pues jessi definide tant che “Civic Solidarity”, o sei chês forme di solidarietât che e cjape dentri ducj i components de societât di là des carateristichis personâls; une solidarietât duncje che e ven concedude ancje a cui che al à une provi-gnince diverse. Un costrut, chest, che al rimande ae idee di “Solidarietât Organiche” di derivazion durkheimane, ven a stâi chês forme di sostegn reciproc che e va di là dai confins dal grup di partignince. Si ben che il concet di une solidarietât che e supere lis barrieris etnichis al fos za presint sul imprim dal capitalisim industriâl, al è soredut cumò che la soli-




Figure 18. Fonts: Indagjin demoscopiche 2009.




Figure 19. Fonts: Indagjin demoscopiche 2009.

darietà, rispjet al passât, e supere ancje lis diferencis culturâls e etnichis (Zoll 2003).

Po dopo, la ricercje e à cirût di capî la impuartance che e ven dade a paîs, religion, titul di studi e motîf di vignude in Italie des personis forestis. Al risulte che, tra chestis cuatri vôs, lis primis trê no son consideradis cussì impuartantis al fin di determinâ la vignude in Italie di une persone foreste; in fat la maiorance dai participants al scandai e aferme di acetâ imigrâts che a provegnin di cualsisei paîs, che a sedin di cualsisei confession e che a vedin cualsisei titul di studi; il titul di studi al rapresente par altri la variabile mancual significative par determinâ la decision di trasferîsi tal forest; a seguissin tal ordin la religion e il paîs. Il motîf di vignude, par cuintri, al è considerât influent; si decît di fat di acetâ dome imigrâts che a rivin in Italie par cierts motîfs (Figuris 20-23). Al derive che “motîf” rispjet a “paîs”, “religion” e “titul di studi” al rapresente une discriminante pal acet di une persone foreste.

Si à procedût, duncje, a analizâ la predisposizion dal autocton al raupt cuntun imigrât daûr de aree di divignince di chest ultin; a chest fin tai cuesîts dedicâts a son stadis elencadis cinc areis gjeografichis di ipotetiche divignince dal forest, o sei “Europe occidentâl e Nordameriche”, “Europe orientâl”, “Sudameriche”, “Afriche”, “Paîs araps”, e cuatri ulteriôrs ipoteticis categoriis di relazion cu la persone imigrade, vâl a dî “coleghe di lavôr”, “vicin di cjase”, “amî”, “om o femine” doprant duncje elements de Scjale di Distance Sociâl di Bogardus par rilevâ il




Figure 20. Fonts: Indagjin demoscopiche 2009.




Figure 21. Fonts: Indagjin demoscopiche 2009




Figure 22. Fonts: Indagjin demoscopiche 2009.

grât di vicinance, o di tindince al svicinament, dai autoctons viers dai fo-rescj. Par dutis lis categoriis di relazion proponudis te indagjin, il rispuidint al indiche lis areis di divignince tal ordin che a son stadis presentadis, duncje al favoris sedi come coleghe di lavôr, che come vicin di cjase, che come amì, che come om/femine un imigràt che al ven di: Eu-




Figure 23. Fonts: Indagjin demoscopiche 2009.

rope occidentâl e Nordameriche, Europe orientâl, Sudameriche, Afriche e paîs araps in cheste succession, cun variaziions di percentuâl a seconde des categoriis di relazion proponudis. L'ordin des areis di divignince al risulte ribaltât te rispueste ae domande provocatorie “Lui nol varès voie di vê a ce fâ cuntun forest che al ven di”, in chest câs la disposizion des areis gjeografichis e viôt i paîs araps al prin puest e la Europe occidentâl e Nordameriche al ultin (Figuris 24-28). Lis rispuestis otignudis a dimostrin che, cundut che il Paîs di divignince de persone imigrade nol rapresente in teorie une condizion determinante par che cheste e sedi acetade, in pratiche al è une variabile che e ven tignude in considerazion; chest risultât al è similâr a chel di altris studis indulà che e je ripuartade




Figure 24. Fonts: Indagjin demoscopiche 2009.




Figure 25. Fonts: Indagjin demoscopiche 2009.




Figure 26. Fonts: Indagjin demoscopiche 2009.




Figure 27. Fonts: Indagjin demoscopiche 2009.




Figure 28. Fonts: Indagjin demoscopiche 2009.

une coession tra il Paîs di divignince dal forest e il grât di acet dal autocton tai siei confronts (Higham 1998, Zolberg 2008). L'ategjament di sfavôr tai confronts dai Paîs araps al pues cjatâ interpretazions svariadis; une des causis plui logjichis e podarès jessi la influence dai mieçs di informazion pe aree gjeografiche dal Vicin Orient e pes sês vicendis bellichis. A supuartâ cheste ipotesis a son i risultâts di analisis condusudis tai Stâts Unîts indulà che, te stesse maniere, si son cjatâts sentiments sfavorvui pes presincis di cheste aree – ancje se no risulte la plui disvantazade in assolût tal grum des provignincis – dopo dal undis di setembar dal 2001 e de partecipazion militâr americane in Afghanistan e Irak (Timberlake e Williams, in publicazion).

3. Conclusions. Chê vignude a flôr e rapresente une part des domandis dal cuestionari; intun panorame di insiemis si à la imagjin di citadins no indiferents al fenomen imigratori, che a àn un diviers grât di afiet pai diviers teritoris proponûts, che a ricognossin la impuartance di sentiments sociâi partecipatîfs come la solidarietât e l'acet, e che a fasin sieltis che a somein vê voie di ridusi eventuâi contrascj sociâi.

Soredut intun moment come chel atuâl dulà che une vore di atenzion e je indreçade ae imigrazion foreste, al è fundamentâl monitorâ la percezion dai autoctons par capî come che e varie la lôr predisposizion, e duncje ancje la lôr capacitât di adatement ae gnove e volubile situazion sociâl, culturâl e etniche. Al derive che vint voie di realizâ integrazion no

si pues fâ di mancûl di capî la part sociâl plui inlidrisade sul teritori, o sei l'autocton stes. Tignî cont di chest aspjet al vûl dî sfuarçâsi di evitâ la sconfite dal multiculturalisim come che al è daûr a sucedi tal Ream Unît, in France e in Gjermanie. In duçj e trê i Paîs, di fat, lis componentis autoctonis e alogjenis te pratiche a son stadis puartadis a vivi in paralêl e cence une reâl interazion reciproche, tant che tal Fevrâr dal 2011 il Prin Ministri britanic Cameron al à scugnût declarâ la sconfite di un sisteme indulà che diviersis culturis a son stadis sburtadis a vivi separadis, ribatint il concet esprimût tal Otubar dal 2010 de canceliere todescje Merkel che e rimarcjave il faliment complet dai tentatîfs di prontâ une coesistenza flanc a flanc tra autoctonis e forescj. La funzion ative e partecipative di dutis cuantis lis componentis sociâls e risulte duncje une esigençe primarie; in cont di chest, l'ex President de France Sarkozy tal Fevrâr dal 2011 al à declarât che masse atenzion e jere stade concentrate su la identitât dai gnûfs rivâts e no avonde su la identitât dal Paîs che ju ricêf (Collins 2011).

Considerâ la percezion des personis cun rivoc sociâl e culturâl sul teritori al pues rapresentâ duncje un strument impuartant par formulâ une strategjie valide pe integrazion, e no alienazion o ben assimilazion, che e cjapi dentri no dome il forest ma ancje l'autocton, prevignint ancje pusibilis degenerazions nazionalistichis. Ven a stâi che la integrazion e varès di podê realizâsi come fusion o colaborazion tra parts ecuidistantis e no juste tai tiermins di un inseriment di personis intun contest sociâl che al ven masse dispès presentât come depersonificât.

Tes siencis psicologjichis, tal contest de percezion sociâl, ae percezion al ven atribuît un caratar strumentâl; di fat par Stadler, Seeger e Raeithel "la percezion e prepare la persone a une azion" intindude ancje dome come chel insiem di procès che si disvolucin dentri dal sogjet. In chest contest, fâ lûs su la percezion al varès ancje la funzion di decifrà lis decisions dal sogjet che al percepìs e previodì determinadis azions. La percezion e cjape sù un valôr centrâl e come che al ricuarde Boring "ancje se basade su sensazions, e je plui che sensazion"; cun riferiment al significât etimologjic de peraule te lenghe todescje, percepî al vûl dî "cjapâ la realtât" (Stadler, Seeger e Râithel 1979).